

Na osnovu člana 30. tačka 1. Uredbe o stipendiranju redovnog studija branilaca i članova njihovih porodica (Službene novine Zeničko-dobojskog kantona, broj: 4/14), a u cilju jednoobraznog postupanja, te što bržeg i efikasnijeg provođenja postupka za dodjelu stipendija studentima pripadnicima branilačke populacije, ministar Ministarstva za boračka pitanja donosi:

INSTRUKCIJU

za provođenje konkursne procedure za dodjelu stipendija studentima- braniocima i članovima njihovih porodica za studijsku 2014/2015. godinu

1. Ovom Instrukcijom za provođenje konkursne procedure za dodjelu stipendija za studijsku 2014/2015.godinu studentima – braniocima i članovima njihovih porodica, daju se pojašnjenja nadležnim općinskim službama za branilačko-invalidsku zaštitu (u daljem tekstu: općinske službe), radi jednoobraznog, bržeg i efikasnijeg postupanja u provođenju iste.
2. Stipendije se dodjeljuju studentima–braniocima i članovima njihovih porodica za redovan i samofinansirajući studij prvog i drugog ciklusa Bolonjskog sistema studiranja na visokoškolskim ustanovama u BiH i van granica BiH, a koji su srednje obrazovanje stekli u školama na području BiH.
3. Zbog važnosti koordiniranog rada između Ministarstva i općinskih službi ovom Instrukcijom određujemo **obavezujući hodogram aktivnosti** u provođenju procedure na dodjeli stipendija, kako slijedi:
 - prijave na konkurs (dvadeset dana) od 11.11. do 02.12.2014.godine;
 - dostava podataka Ministarstvu po zaprimljenim zahtjevima-po kategorijama branilačke populacije i godini studija (osam dana) do 10.12.2014. godine;
 - pribavljanje podataka o dodjeli stipendija drugih davalaca do 17.12.2014. godine;
 - bodovanje prijavljenih kandidata do 24.12.2014.godine;
 - isticanje Preliminarne liste na oglasnoj ploči općine, web stranici općine i boračkih udruženja i dostavljanje iste Ministarstvu (pošta i e-mail) do 29.12.2014.godine;
 - nadzor nad provođenjem konkursne procedure predstavnika Ministarstva /teren) u odabranim općinskim službama Kantona, do 07.01.2015.godine
 - podnošenje zahtjeva za preispitivanje Preliminarne liste (osam dana) do 07.01.2015.godine;
 - razmatranje zahtjeva za preispitivanje Preliminarne liste i donošenje rješenja o odbacivanju /odbijanju zahtjeva do 14.01.2015.godine;
 - izrada i isticanje Konačne liste prvenstva kandidata na oglasnoj ploči općine, web stranice općine i udruženja, dostavljanje iste Ministarstvu (pošta i e-mail) do 21.01.2015.godine;
 - izrada i dostavljanje konačne liste i obavijesti Ministarstva o broju dodjeljenih stipendija koja je u zavisnosti od visine utvrđenih budžetskih sredstava opredjeljenih po općinama do 30.01.2015.godine;
 - donošenje rješenja o dodjeli, odnosno odbijanju zahtjeva za dodjelu stipendije, na osnovu konačne liste i obavijesti Ministarstva do 06.02.2015.godine;
 - podnošenje žalbi i dostavljanje istih Ministarstvu (osam dana) do 14.02.2015.godine;
 - razmatranje žalbi u Ministarstvu do 06.03.2015.godine;
 - dostava odluke Ministra o dodjeljenom broju stipendija sa iznosom doznačenih sredstava do 13.03.2015.godine;
 - izrada naloga za plaćanje prve rate stipendije, do 20.03.2015.godine;
4. Rukovodilac općinske službe će po svom izboru po potrebi imenovati komisiju ili odrediti uposlenika koji će biti zadužen za obradu i vođenje zahtjeva - predmeta po konkursnoj proceduri.
5. Obrazac za prijavu na javni konkurs kao i sve druge potrebne informacije o postupku izbora kandidata općinske službe su dužne učiniti dostupnim svim zainteresovanim kandidatima u vrijeme trajanja konkursa.
6. Po dostavljenoj Obavijesti Ministarstva, Konkurs objavljen u Dnevnom avazu općinske službe su dužne istaknuti na oglasnoj ploči općine, te javno i transparentno objaviti putem lokalnih sredstava informisanja,

- web stranice općine i lokalnih boračkih udruženja, kako bi se što veći broj aplikanata mogao blagovremeno prijaviti na raspisani konkurs.
7. U skladu sa članom 22. tačka a) Uredbe, Općinska služba je dužna pribaviti podatke o dodjeljenim stipendijama drugih davalaca, a u cilju eliminisanja iz postupka kandidata koji već ostvaruju stipendiju za studij po drugom osnovu (odnosi se i na studente koji studiraju na privatnim fakultetima u BiH i van granica Bosne i Hercegovine).
 8. Kandidati će pred službenom osobom u općini potpisati izjavu da nisu korisnici stipendije po drugom osnovu u studijskoj 2014/2015 godini i ista je jednoobrazna u svim općinama Kantona i sastavni je dio spisa predmeta kandidata.
 9. Lica iz tačke II i III Konkursa, izuzev a), b), i c) tačke II, pravo na dodjelu stipendije mogu ostvariti za redovan studij na visokoškolskoj ustanovi ako su upisali studij do navršene 25.godine života.
 10. Prihod po članu porodičnog domaćinstva (584,80 KM) ne odnosi se na kandidate koji su korisnici prava po rješenju nadležnog organa općine (do 25.godine života)- članove porodice šehida, poginulih, umrlih i nestalih branilaca i umrlih ratnih vojnih invalida i članovi uže porodice poginulih, umrlih ili nestalih dobitnika ratnog priznanja ili odlikovanja.
 11. U skladu sa članom 20. stav 1. tačka c) Uredbe po osnovu dva i više *redovna* studenta- za dodjelu stipendije iz jednog domaćinstva, studentu koji je aplicirao na konkurs pripada 10 bodova uz obavezno priloženu potvrdu o redovno upisanom semestru/godini fakulteta drugog studenta (brata ili sestre).
 12. U skladu sa članom 20. stav 1. tačka d) Uredbe po osnovu svakog narednog člana porodičnog domaćinstva – redovnog studenta - za dodjelu stipendije iz jednog domaćinstva, studentu koji je aplicirao na konkurs pripada po 10 bodova uz obavezno priloženu potvrdu o redovno upisanom semestru/godini fakulteta trećeg, četvrtog studenta (brata ili sestre).
 13. U skladu sa članom 21. stav 2. Uredbe po osnovu ratnog staža oba roditelja uzima se period od 06.04.1992.godine do 23.12.1995.godine.
 14. Ratni staž RVI od 20% do 60% invalidnosti se boduje od početka stupanja RVI u OS do 23.12. 1995.godine.
 15. Preliminarna i konačna lista je formatirana i popunjavanje kvadratića se vrši po principu ponuđenih opcija, nije dozvoljeno mijenjati zadate formule.
 16. Preliminarne i konačne liste službe su dužne u utvrđenom roku hodograma dostaviti Ministarstvu putem e-mail i pošte (ovjerene i potpisane od strane ovlaštene osobe).
 17. U slučaju kada je roditelj podnosioca zahtjeva (studenta) prije raspisanog konkursa podnio zahtjev za penzionisanje, a procedura nije okončana, u tom slučaju uzimati će se posljednja plata prije podnošenja zahtjeva za penzionisanje, kao prihod člana domaćinstva i bodovati kandidata u skladu sa Uredbom.
 18. U slučaju kada je roditelj podnosioca zahtjeva (studenta) zaposleno lice (u radnom odnosu), ali koje već duže vrijeme ne prima platu, bodovanje podnosioca zahtjeva u skladu člana 20. tačka 1. stav e) Uredbe „po osnovu prihoda po članu domaćinstva“ vrši se tako da se za prihod koristi visina polovine prosječne neto plaće ZDK za 2013. godinu u iznosu od 365,50 KM.
 19. Bodovanje prijavljenih kandidata vrši se na obrascu koji se nalazi u prilogu i sastavni je dio spisa predmeta kandidata. Kandidati –korisnici prava člana 3. stav 1.tačka d) i e) su korisnici prava do 25 godina života po rješenju nadležnog organa (članovi porodice šehida, poginulih, umrlih i nestalih branilaca i umrlih ratnih vojnih invalida i članovi uže porodice poginulog, umrlog ili nestalog dobitnika ratnog priznanja ili odlikovanja) na koje se ne odnosi član 8.stav (1) tačka d) Uredbe nisu u obavezi da dostave prosjek ocjena (dovoljna potvrda o upisu semestra/godine i kopija indexa) i prihode članova domaćinstva sa kućne liste.
 20. Studenti koji su srednje obrazovanje stekli u školama na području Bosne i Hercegovine, a visokoškolsku ustanovu su upisali van granica Bosne i Hercegovine u obavezi su uz ostalu traženu dokumentaciju priložiti i potvrdu o redovnom upisu semestra/godine studija fakulteta sa prosjekom ocjena iz predhodne godine studija prevedenu i ovjerenu kod ovlaštenog sudskog vještaka i službe će iste kandidate bodovati u skladu člana 19-21. Uredbe.
 21. Studenti II ciklusa po Bolonjskom sistemu školovanja su u obavezi dostaviti i kopiju zdravstvene knjižice na osnovu koje će se utvrditi na čijem osiguranju se isti vodi (Biro, roditelj, firma u kojoj je zaposlen).
 22. Bodovanje po Bolonjskom sistemu školovanja prve godine II ciklusa studija boduje se tako što se prosjek ocjena studenta uzima iz završne godine I ciklusa, sa visinom stipendije u ukupnom iznosu od 1.200,00 KM.

23. Vrijeme od osam dana od dana isticanja Preliminarne liste, odnosno prijem zahtjeva za preispitivanje Preliminarne liste se računa od momenta isticanja iste na oglasnoj ploči općine.
Općinska služba je obavezna podnosioca zahtjeva pismeno obavijestiti o stavu po podnesenim zahtjevima.
24. U skladu sa članom 22. tačka (3) Uredbe općinske službe donosi rješenje u skraćenom postupku na osnovu člana 139. stav 1. i 2. ZUP-a o odbacivanju neurednih zahtjeva, odnosno odbijanju zahtjeva kandidata koji ne ispunjavaju uvjete, nakon isticanja preliminarne liste.
25. U skladu sa članom 24. Uredbe, općinska služba sačinjava konačnu listu prvenstva kandidata za dodjelu stipendija, koja je osnov za donošenje rješenja o dodjeli stipendija, rješenja o odbijanju zahtjeva pri čemu je broj studenata kojima će stipendija biti dodijeljena u zavisnosti od visine utvrđenih budžetskih sredstava opredijeljenih za svaku općinu (obavijest i konačna lista Ministarstva), a ista se određuju na osnovu procentualnog učešća pripadnika branilačke populacije općine u odnosu na njihov ukupan broj u Kantonu.
26. Po žalbama koje dostavljaju općinske službe u terminu hodograma odlučuje Ministarstvo. Uz žalbe općinska služba dostavlja preliminarnu listu, konačnu listu, predmete kandidata koji su uložili žalbu, kao i ostale relevantne dokaze koji mogu poslužiti u donošenju rješenja drugostepenog organa.
27. Po okončanju žalbenog postupka općinska služba uređuje konačnu listu za dodjelu stipendija (u smislu uvrštavanja imena svih studenata po ostvarenom broju bodova čije su žalbe uvažene i odbijene žalbe u kojima je promjenjen broj ostvarenih bodova) koju u pisanom i elektronskom obliku ponovo dostavlja Ministarstvu na dalju realizaciju.
28. U slučaju saznanja za nove činjenice koje dovode do drugačijeg rješenja, Ministarstvo će u skladu sa članom 254. i 255. Zakona o upravnom postupku ("Službene novine Federacije Bosne i Hercegovine" broj 2/98 i 48/99) donijeti novo rješenje, kojim će poništiti i ukinuti ranije rješenje.
29. U skladu sa članom 26. Uredbe Ministar donosi odluku o broju dodjeljenih stipendija i istu dostavlja u općine Kantona, a odluke o broju dodjeljenih stipendija, rekapitulaciju i nalog za isplatu prve rate stipendije dostavlja Ministarstvu finansija na realizaciju.
30. Arhiviranje predmeta po okončanju postupka odabira kandidata za dodjelu stipendija vrši općinska služba.
31. O doznačenim sredstvima za isplatu rate stipendije općinske službe obavještavaju korisnike putem sredstava informisanja i isplatu istih vrše na tekuće račune korisnika stipendija, a pravdanje se vrši u roku od 15 dana od dana uplate istih.
32. O terminu mogućeg nadzora nad provođenjem konkursne procedure, općinske službe će naknadno biti obavještene po utvrđenom planu hodograma aktivnosti Ministarstva.

Prilozi: - Konkurs za dodjelu stipendija studentima..... za studijsku 2014./15.godinu,

- obrazac za prijavu na javni konkurs
- obrazac dostave podataka po podnesenim zahtjevima;
- Izjava o nekorištenju stipendije po drugom osnovu;
- obrazac bodovanja,
- obrazac tabele za Preliminarnu i Konačnu listu,
- obrazac rješenja o dodjeli stipendije-član 211 ZUP;
- obrazac rješenja o odbacivanju zahtjeva za dodjelu stipendije- član 139.stav 1. i 2. ZUP;
- obrazac rješenja o odbijanju zahtjeva za dodjelu stipendije - član 139.stav 1. i 2. ZUP;
- obrazac rješenja o odbijanju zahtjeva za dodjelu stipendije -član 139.stav 1. i 2. ZUP.

Napomena: Svi navedeni prilozi su dostavljeni općinskim službama i putem e-maila.

Broj:13/03-2-3-38-21575-2 /14.
Zenica, 07.11.2014.godine.

MINISTAR
Nedžad Lokmić